

ՆԿԱՐԻՉ Գ. ԲԱՇԻՆՋԱՂՅԱՆԻ
«ԶՈՐԱԳԵՏԸ ԳԻՇԵՐՈՎ» ՆԿԱՐԻ ԱՌՋԵՎ

- Արտինատ, քաջերի այս ձորն ահարկու
Յուր բնավայրից փոխադրել ես դու.
Մեծ է արդարև, մեծ է քո հոգին,
Որ ընդգրկել է ժայռերն ահագին
- 5 Իրենց սեփական խոր մտածմունքով,
Փրփրուն գետը փայլուն ծփանքով,
Լուսին-աստղերով կամարը երկնի
Եվ համատարած խավարն ահռելի...
Լուռ հանգստություն – գիշեր է մթին.
- 10 Հանգստանում է նաև իմ հոգին:

- Բայց ահա, այնտեղ, ձորի խորքերում
Մի մենակ վառվող լույս է երևում.
Այո՛, մի խուղ կա այն ձորի միջին,
Դու ճանաչում ես նորա բնակչին...
- 15 Օ՛հ, չես ճանաչում – անծանոթ ես դու,
Բայց թե գիշերը և նրա հոգու
Կարողանայիր տեսնել և զգալ –
Հանգստություն չէիր նայողին դու տալ: